

مسرحية

ال "هناك"

تأليف

محمد ياسين

يُحظر تنفيذ النص دون التواصل مع الكاتب

+201203909685

Mohamedyaseen12795@gmail.com

الشخصيات

- حليم.
- نبيلة.
- رئيس التحرير.
- الصديقة.
- المفوض.
- فؤاد.
- جميلة.
- حازم.

الديكور: تتحلّى الصورة بطابع تعبيرى، ويتم استخدام التكتيفات الرمزية للتعبير عن المواقع التي يجري بها الأحداث سواء في ال "هنا"، أو ال "هناك".

ال "هنا"

قبل فتح الستار ولمدة دقيقة تصدر أصوات زحام وضوضاء آلات وسيارات وأصوات بشرية مختلطة ولا يمكن تمييزها بوضوح، وتزداد حدة تداخل الأصوات بالتناوب مع ومضات الإضاءة على الستار وعلى الحضور في أماكن مختلفة.

يُفتح ستار المسرح بالتزامن مع سعال شديد يصدر عن نبيلة وهبوط لسيل قمامة من الأعلى.

(1)

(سحابة دخان في الأجواء بينما نبيلة "الناشطة البيئية" وصديقتها تسيران في الشارع)

الصديقة: صداقتي ليكي هتكون السبب في دخولي الجنة.. متأكدة.

نبيلة: آسفة بس مفتكرش إنك هتدخلوها.

الصديقة: جنة أو نار.. أهم حاجة مكنش معاي في نفس المكان.

نبيلة: من ورا قلبك.

الصديقة: من جوا صميم قلبي.

نبيلة: جوا صميم؟ (تسعل بشدة وتستمر في السعال أثناء كلام الصديقة).

الصديقة: براحتك براحتك.. أخذتي الدوا؟ (تعطيها مياه وتشرب نبيلة بينما تقوم الصديقة باستخراج "بخاخة استنشاق" من حقيبتها، وتستنشق نبيلة عبر الفم، وهي تنظر للصديقة في غيظ) متزعليش يا ستي.. نسيت إنك صاحبة مرض (تنظران لبعضهما البعض بعد صمت قليل ثم تنفجران في الضحك).

نبيلة : إنتي بتعايريني؟

الصديقة : آه.

(حليم يقتحم مكتب رئيس التحرير).

رئيس التحرير: الأستاذ حليم المتمرد المراهق.. اتفضل يا فندم يا ترى عاوز إيه المرة دي؟

حليم: (يخلع كاماته) التحقيق متشرش ليه؟

رئيس التحرير: تفتكر ليه؟

حليم: أيوة أنا عاوز أعرف.

رئيس التحرير: المفروض نسمحلك تخرج عن سياسة التحرير براحتك؟

حليم: مش قادرين نتنفس وبنموت من تلوث الهوا وكل اللي مهتمة بيه أكبر صحيفة في ال "هنا" متابعة ماتشات الكورة وأخبار النجوم، وتوقعات الأبراج.. دي سياسة التحرير؟ ده دورنا؟
رئيس التحرير: لا طبعا يا حليم.. بس هنعمل إيه؟ إحنا نسينا إن دورنا الحقيقي إننا نشتغل خدامين عند سيادتك، وننشر تحقيقاتك اللي ملهاش سند ولا بيدعما أدلة كفاية.

الصديقة: تفتكري ناس ال هُنا يستاهلوا اللي بتعمليه؟

نبيلة: هنفتح الموضوع ده تاني؟

الصديقة : وتالت

أيوة يستاهلوا إيد تتمدلهم، ويستاهلوا يشموا هوا نضيف ويحلموا بهُنا كله جمال وزرع (لأحد المارة).

حليم: كفاية على الناس في ال هُنا المعاناة اليومية اللي بيعيشوها... اقرا التحقيق تاني لو سمحت وراجع أقوال المصادر.. شحنة الأدوية لو دخلت ال "هنا" (يتوقف عن استكمال الجملة ويتدارك)..

الصديقة: مفيش زرع بيعيش هنا.

نبيلة: بيتهايلك..

الصديقة : بصي حواليلي يا نبيلة.

نبيلة: الزرع عنيد، وبيقاوم أكثر مننا.. (لأحد المارة) ازرع شجرة.. (لا يهتم بدعوتها).

الصديقة: سكان ال "هنا" يستحقوا يمشوا من هنا وميرجعوش تاني.. ازري شجرة.

نبيلة: امشي إنتي طالما ناقمة كدة.

الصديقة: بتموتي نفسك يا نبيلة، ومحدث مهتم.

نبيلة: مش مهم.. أكيد هيستجيبوا.. (تنظر لها الصديقة نظرة استنكارية، فتستدرك نبيلة) ممكن واحد يستجيب.. واحد بس.

الصديقة: بنعمل كدة عشان واحد بس؟

نبيلة: (في عند) أيوة.

الصديقة: حبيبتي إنتي عندك ربو.. المفروض متخرجيش من البيت أصلا.. (تنظر لها نبيلة في استنكار) متخرجيش لمدة طويلة.

نبيلة: مش هموت من الربو.. ممكن تسببيني أشوف شغلي؟

الصديقة: شغلك مُدرسة يا نبيلة.

نبيلة: تفتكري ربنا خلقي كدة غلطة؟ (صمت) خدي (تُعطيها جزء من الورق) ووزعي وإنتي ساكتة.

رئيس التحرير: تفتكر إيه اللي ممكن يحصل لو التحقيق اتنشر؟ واترفع على الجورنال قضايا تشهير، وإنت عارف كويس أوي إزاي ممكن يتم تدمير كل الأدلة.

حليم: وحضرتك عارف إيه اللي هيحصل لو الكمية دي من الدوا دخلت ال "هنا"!

رئيس التحرير: مالك يا حليم! ليه بتدور على المشاكل؟ تقدر تقولي آخر مقال ليك اتوافق على نشره كان امتي؟ مرة صفقة الأدوية ومرة فساد ومرة كسب غير مشروع .. إيه! كل ال هنا أصبح خراب؟

حليم: (صمت وتأمل لرئيسه) إنت إزاي اتغيرت كدة؟ فاكرك لما كنت بتدرسلنا في الجامعة؟ فاكرك كلامك عن الميثاق الصحفي والضمير اليقظ، وأمانة الكلمة؟

رئيس التحرير: آه، وفاكر كمان كلامي عن الصحافة الصفراء، وتحذيري من عدم تحري الدقة في استقصاء الخبر.

نبيلة: هتزرع شجرة؟ (يومئ الرجل بالإيجاب ويغادر فتصيح) إنت شاطر شاطر.

الصديقة: (للرجل) هي كويسة متقلقش.. يعني هتبقى كويسة.

نبيلة: (في احتفال) هيزرع شجرة! هيزرع شجرة! (تسعل).

الصديقة: كفاية النهاردة يا حبيبتي عشان صحتك.

نبيلة: شوفتي؟ هيزرع شجرة.

حليم: لو التحقيق طلع مضروب إيه اللي هيحصل؟

رئيس التحرير: هنترقد.. إحنا الاتنين.

حليم: ولو حقيقي؟

رئيس التحرير:

حليم: ملايين الناس هيكونوا عرضة إن دوا فاسد يدخل أجسامهم.. هنكون مساهمين زيهم بالظبط في الفساد وإلحاق الأذى بأهلنا.

رئيس التحرير: اتفضل دلوقتي يا حلیم.

حلیم: هتفكر فی الموضوع؟

رئيس التحرير: همضيلك على أجازة لمدة يومين.

حلیم: والتحقيق؟

رئيس التحرير: انساه.

حلیم: إنت مجرم.. زيك زيههم بالضبط.

رئيس التحرير: (ينظر لحليم نظرة عدم تصديق).

(صمت).

(تزداد كثافة سحابة الدخان فتُصاب نبيلة بنوبة سعال جديدة وتزداد حدتها).

الصديقة: نبيلة! يالا نمشي من هنا.

نبيلة: أنا كويسة.. (تحاول أن تتكلم فتزداد نوبة السعال إلى الدرجة القصوى ولا تستطيع أن تتحدث إطلاقًا).

رئيس التحرير: أنا مش سعيد إني همضي على استقالتك.

حلیم: أنا مستقلتش.. (يترك المكان ويغادر بعد نظرات متبادلة مع رئيس التحرير).

الصديقة: نبيلة.. نبيلة.. (نسمع من بعيد صوت سيارة إسعاف، ويخفت صوت السعال).

(2)

- يمر شخص، ويرمي خطابًا عند قدم حلیم في الشارع وينصرف.

- يمر شخص آخر ويعطي خطابًا لنبيلة التي تقوم بالدعوة للنشاط البيئي مرة أخرى.

(يقرأ كل من حلیم ونبيلة الورقة).

(3)

(يدخل كل من حلیم ونبيلة إلى مقر المُفوض وهما يتظران إلى الرسالة).

المفوض: أهلا حلیم.. أهلا نبيلة.

حلیم: مین؟

المفوض: المفوض.. مبعوث من ال هُناك.

نبيلة: ال هُناك؟

المفوض: المكان الی بیدلکم إیدیه وبیدیکم فرصة ثانية لحياة أفضل..

نبيلة: فین المكان ده؟

المفوض: فی أبعد نقطة من ال "هنا".

حلیم: اشمعنی إحنا؟

المُفوض: لإنکم تستحقوا.. رصدنا عذابکم وعارفين قد إيه اتعقدت حیاتکم هنا.. آن الأوان لأرواحکم المعذبة إنها تترتاح.. بأکد لکم إنتو فی أمس الحاجة للتواجد بال "هناك"، وال "هناك" فی حاجة ملحة لیکم.

نبيلة: والباقي يموت؟

المُفوض: ال "هناك" قيد التأسيس ومساحته الحالية الصغيرة لا يمكن استيعابها کل الناس فی الوقت الحالي..

نبيلة: سامحني ولكن اختیارنا من وسط الملايين فی ال "هنا" خاضع لمعايير عنصرية.

المفوض: إنتو البداية یا نبيلة.. بإیدیکم تعمروا ال "هناك" وتكبروه عشان يتسع لكل اخواتکم وأهلکم الی استحات حیاتهم فی ال "هنا" وفي کل "هنا".

نبيلة: مین فی ال "هناك"؟

المفوض: عدد قليل.. کلهم أرواح نقية ومخلصة.

حلیم: إيه وضع الحريات فی ال "هناك"؟

المفوض: مكفول لكل فرد حرية التعبير.. حرية الاختیار.. حرية التصرف.

حلیم: النظام الاقتصادي؟

المفوض: مهنة كل أهل ال هُناك هي الزراعة.

نبيلة: فی شجر؟

المفوض: أكثر من البشر.

حلیم: من حق كل إنسان يحلم؟

المُفوض: من حق كل إنسان يحلم.

حليم: كل إنسان؟

المُفوض: كل إنسان.

نبيلة: الهوا؟

المُفوض: صالح للتنفس.. صالح للحياة.

نبيلة: الجمال؟

المُفوض: هو الفلسفة اللي قايم عليها ال "هُناك".

نبيلة: أنا مش عاوزة أسيب ال "هُنا".

المُفوض: البديل إنك تفقدي القدرة على التنفس وتموتي.

حليم: خايف إن ده يكون هروب وخيانة.

المُفوض: قلمك اتكسر يا حليم ومفيش حد قدملك ولا هيقدملك قلم تاني هنا.. القرار ليكم.

حليم: إيه اللي يضملي إن المكان ده مش وهمي؟

نبيلة: بالظبط، رسايل غامضة بتتبع وتقابلنا في مكان محدش يعرف عنه حاجة.. إيه اللي يضمن

فعلا إنك مش بتخدعنا؟ (حليم) شاطر.

المُفوض: للأسف مش هقدر أقدم ضمانات مؤكدة.. بس أفكر أي هُناك مهما كان سئ أفضل من ال

هُنا.. القرار ليكم.. حليم؟

حليم: أرفض.

المُفوض: (ينظر لنبيلة لتعلن قرارها).

نبيلة: أرفض.

المُفوض: (يقدم لكل منهما ورقة عقد وقلم) ال "هُناك" بيحترم قراركم ويضمن حرية الاختيار..

أستاذنكو تمضوا على الاتفاق البسيط ده اللي بينص على ضرورة الاحتفاظ بسرية المقابلة.

(4)

- تسير نبيلة بشارع وهي مرتدية كمامة و"جواني" ومعها مجموعة صغيرة يقومون بتنظيف الشوارع.. يهبط سيل قمامة جديد من الأعلى، وتنصرف المجموعة المصاحبة بعد اكتشاف عدم جدوى ما يفعلون، وتبقى معها الصديقة.

الصديقة: رايعين فين؟

نبيلة: منقدرش نلومهم (يبدو عليها علامات الإحباط).

الصديقة: امشي يا نبيلة.. اسمعيني! تلوث الهوا يزيدي كل يوم.. (تريها شاشة آيباد) شوفي بنفسك.. معدلات التلوث هتوصل لدرجات غير مسبوقة.. خلينا نشوفلك أي هنا تاني آمن.. تقدر تتنفسي فيه على الأقل.. لو كملتي هنا هتموتي.. ال هنا غير مناسب ليكي.. ناسية؟ ده مش كلام الدكاترة.. حبيبي إنتي محتاجة تعيشي.. امشي (تصمت وتدمع) إنتي فاكرة اللي بقوله ده سهل عليا؟.. امشي.. ال "هنا" مميت.. (تحتضنها نبيلة).

(5)

(يعود حليم ونبيلة إلى مقر المفوض).

المفوض: كنت متأكد إنكم هترجعوا.. للمرة الأخيرة.. هل توافقان على الذهاب إلى ال "هناك" بكل إرادتكم؟

حليم: موافق.

المفوض: نبيلة؟

نبيلة: موافقة.

المفوض: قرار صائب يا رفاق.. روحكم تستحق تهدي بعد اللي شافته من عذاب.. تستحقوا ال هناك حيث لا مكان للمفوضي ولا لانسحاق الذات تحت وطأة القبح.

(تبدأ عملية الانتقال).

المفوض: (أثناء الانتقال) سنجذك حين يتجاوز الألم الذي يعتمل بداخلك حدوده القصوى.. سنجذك حين تبلغ بك غربة الذات حدًا جهنميًا.. هذا وعد ال "هناك".. إلى ال "هناك" السكن الآمن الرحيم.

يُغلق الستار

ال "هناك"

قبل فتح الستار تصدر أصوات باعثة على الراحة والاسترخاء، ويُفتح ستار المسرح فنرى مفردات صورة مغايرة تمامًا.

(1)

(يصل حليم ونبيلة والمفوض إلى موضع في ال "هناك"، فيرحب بهما المارة بابتسامة، بينما هما يتأملان المكان).

حليم: (يأخذ نفسًا عميقًا مغمضًا عينيه) هوا صالح للتنفس.

نبيلة: (تأخذ نفسًا عميقًا ثم تدمع).

(يسير حلیم متأملًا المكان).

المفوض: أهلا يا شركاء العيش الصالح في ال "هناك" الموعود.. أهلا بكم يا أبناء العالم الجديد.. ده الجزء من عالمنا اللي أنا مفوض بإدارة شئونہ.

حلیم: هنعيش فين وإزاي؟

المفوض: (يبتسم) أهلاً يا رفاق.

(يدخل فؤاد وجميلة وحازم ويغنون نشيدًا موحدًا وهم يتبادلون التحيات مع حلیم ونبيلة وبياشرون العمل): ال هناك.. دنيا التفاني والعمل.. ال "هناك" أرض الأمان والأمل.. يا ناظرًا للمستحيل.. في أرضنا هو محتمل.

المفوض: أرض ال "هناك" ملكية عامة للجميع... كل ال "هناك" مسكنكم.. كل الأرض خيرها ليكم.. لكل فرد مسكنه الخاص الآمن.. مفيش فرق في مساحة أو طبيعة المسكن.. مفيش تمييز في الملابس.. مفيش تباين في الثروات.. في الحقوق.. في الواجبات.. الكل هيزرع.. الكل هيحصد، والعائد هيتوزع بالتساوي بين الجميع.. ال "هناك" هيمدكم باحتياجاتكم الأساسية لحد أول حصاد.

(يُعطى المفوض لحليم ونبيلة بذور ويشاركان هما أيضًا مع الباقيين).

المفوض: العمل المشترك يخلي الفرد يدوب في المجموع.. يحرر الإنسان من رغباته ونزعاته الخاصة.. ويعلمنا إن الخلاص مش فردي.

حلیم: الخلاص عمره ما كان فردي.

المفوض: المجموعة اللي هتشارككم العمل.. كل واحد منهم جاي من هنا مختلف ولسبب مختلف.. الكل لقي نفسه في عالمنا (يُشير إلى كل شخص يقوم بالتعريف به) فؤاد الأكبر سنًا والأقدم.. جميلة الأكثر نشاطًا.. أما حازم هو الأصغر والأحدث انضمامًا.. (للمجموعة) حلیم.. نبيلة.

فؤاد وجميلة وحازم: (يقومون بإعطاء تحية ما موحدة لحليم ونبيلة).

نبيلة: حرام.. لسة صغير.. ليه بيشتغل؟

(يبتعد حازم ويبدو عليه الخوف).

المفوض: حازم بيشتغل نص الوقت المخصص للكبار.. خصصنا له برنامج دراسي عشان يكمل اللي ناقصه من تعليم.. هسيبكم مع بعض تتألفوا وتتعارفوا.. (يُغادر).

حلیم: (لفؤاد) بقالك أد إيه هنا؟

فؤاد: شهرين.

نبيلة: بس!! وإنت أقدم حد هنا!

فؤاد: فيه ناس أقدم مني في مجموعات تانية.. لكن حتى أقدم واحد ممرش عليه شهور.

نبيلة: متحمسة أوي للشغل معاكم.

جميلة: متأكدة هنكون ثنائي رائع.

نبيلة: (لحازم) إنت ليه خايف؟

حازم: (يبدو من طريقة كلامه أن لديه تعثر في النطق) أنا كويس.

حليم: أنا كمان متحمس أكون واحد منكم، ومتحمس لرابطة الأخوة اللي هتتكون بينا.

فؤاد: أهلا بيك.. فرد جديد في العيلة.

نبيلة: إنتو من أي هنا؟ ال هنا بتاعكو عامل إزاي؟ عاوزة أعرف عن كل واحد فيكم.

حازم: مش عاوز أحكي.

جميلة: أنا موافقة.. الإنسان بيتعافى بالحكي.

فؤاد: إنتو إيه حكايتكو؟

نبيلة: حكايتي بسيطة.. ناشطة بيئية اتولدت بأزمة ربو في أكثر هنا فيه تلوث للهوا.

فؤاد: وحليم؟

نبيلة: نفس ال هنا.

حليم: (لنبيلة في ابتسام) اديني فرصة أعبر عن نفسي..

نبيلة: آسفة.. اتفضل.. في ال هنا بتاعنا..

حازم: قال المدرس في المدرسة: قوم امسح السبورة يا حيوان.. استنى.. مين ضريك؟ هم.. تستاهل! وفي البيت بابا قالي ما إنت عشان ضعيف وخايب.. لو كنت طبيعى كنت قدرت تدافع عن نفسك.. أنا مش ضعيف.. لا ضعيف.

جميلة: ال "هنا" بتاعنا كله دمار وحرب وقصف مدفعيات وضرب طيارات.

فؤاد: وال "هنا" بتاعنا سجن ممنوع فيه الحلم.

حازم: في ال "هنا" بتاعنا كتب المدرس على السبورة إيه أسباب الهجرة؟ مين عارف يقول؟ (كأنه يردد إجابات زملائه بطريقة آلية سريعة كأنها محفوظة عن ظهر قلب) قام واحد وقال زادت الهجرة لرغبة الإنسان الفردية في الكسب المادي السريع.. إجابة صحيحة، وإنت إيه إجابتك؟

جميلة: كل بيوت الحارة اتقصفت، والي نزحوا في الخيام عاشوا في قلق وتوتر وانتظار للموت كل دقيقة، وفي الوقت اللي المفروض الناس تتحد فيه زادت الخلافات.. زادت من اليأس، وكثرت حالات الطلاق.

فؤاد: زي زي أي ترس صغير حلم يوم يكون ترس كبير، وخصص كل وقته للحلم ده.. سعيت كل دقيقة في وظيفة أحلامي بكل شغف وبكل إصرار وحماس.. كنت الأقدر، وكنت الأحق.
جميلة: عصبيته وخنقته زادت يوم عن يوم وزادت المسافة بيني وبينه.. هو كمان يأس.
فؤاد: لما كبر الحلم وقربت ألمسه.. هدوه.. حلم بسيط ومشروع.. بس في ال هُنا بتاعي مفيش حلم بسيط مشروع.
جميلة: المرة دي الخناقة كانت مصدرها خيمتنا.. مشي وسابني.. الضغوط كانت أكبر مني ومنه ومن احتمال أي عقل، وبعد لما الحرب انتهت ملقتوش ولا لقيت نفسي.
حازم: إجابتي هي إن الهجرة زادت لإن الشمس مطلعتش هنا من زمن بعيد.. غلط.. محدش بيحترم الإنسان هنا.. غلط (يصفع نفسه على وجهه).. كل اللي سافر عاش.. غلط (يصفع نفسه).. وكل اللي فضل مات (يصفع نفسه)، (في تحدي) وأنا همشي في أقرب فرصة.
(يقترّب حليم ونبيلة من الثلاثة ويتشكل تكوين يدل على تضامنهم سوياً، ويعبر عن احتمائهم ببعضهم البعض من المعاناة المشتركة).

(2)

(في وقت متأخر من الليل.. نبيلة تقف أمام مسكنها ويظهر حليم).
حليم: (وهو يتأمل ما حوله) ال هُنااك!
نبيلة: ال هُنااك.
حليم: إيه اللي مصحيكي دلوقتي؟
نبيلة: معرفتش أنا.. بحاول أستوعب كل اللي حصل.. حاسة إني بحلم.. إنت ليه منمتش؟
حليم: مين هيجيله نوم في الليلة دي.. فضلت واقف في الشباك أتنفس بس.. بعوض كل الهوا الفاسد اللي شميته في حياتي.
(يتبادلان الضحك).
نبيلة: أول مرة أشوفك بتضحك.
حليم: (يتوقف حليم عن الضحك).
نبيلة: كمل وقفت ليه؟
حليم: يعني مش متعود.
نبيلة: اتكسفت!

حليم: لا..

نبيلة: الخيال اللي عايشينه ده هو الواقع اللي اتنميته لل هُنا.. مش عارفة بس إيه هيكون دوري في الجنة دي.. كل حاجة مضبوطة.. مين هنا هقوله ازرع شجرة.. هيوحشني الناس في ال هُنا.

حليم: بتحبي إنتي الناس في ال هُنا.

نبيلة: بحب الناس في أي مكان.. هو إنت مش بتحب الناس؟

حليم: مش كلهم.. مش برئ زيك.. الشر عظيم في البشر.

نبيلة: محتاجين نشوف الخير اللي جواهرهم، ونراهن عليه.

حليم: لعلمك أنا مبكرهش ال هُنا.. بحبه أكثر من رئيس التحرير على الأقل.. في وقت من الأوقات كنت قادر أتعاطف مع ناس ال هُنا.. مع الزبالة والدوشة والدخان اللي حرمننا من البص للسمما.. كنت متصالح مع كل ده وبلونه بصبغة رومانسية كنت عاوز أساعدهم يشوفوا لون السما الحقيقي أو حتى أحكيلهم عنه.. معرفتش!

نبيلة: هترجع تحكيلهم..

حليم: بتحلمي تحققي إيه هنا.

نبيلة: عيشة طيبة.

حليم: بس؟

نبيلة: بس، وإنت؟

حليم: أكتب روايتي اللي بحلم بيها من أيام ما كنت بدرس صحافة.

نبيلة: تفتكر هتحقق أحلامنا؟

حليم: مش متأكد.. اتعلمت أكون حذر دايمًا.. اختبارات ال "هنا" مكنتش سهلة.. إنتي حاسة إيه؟

نبيلة: بيسموني أستاذة متفائلة، فجوابي هيكون أكيد آه.

(يبتسم لها حليم).

(يظهر حازم.. يبدو عليه آثار الاستيقاظ من النوم).

حازم: بتعملوا إيه؟

نبيلة: أهلا أهلا أستاذ حازم.. ولا حاجة.. مبنعملش حاجة.

(صمت وينظر لهما حازم نظرة ذات مغزى).

حازم: ممكن نلعب لعبة؟

نبيلة: ممكن طبعا.

حليم: لعبة إيه؟

حازم: كان نفسي ألعبها معاها.. كنت دايمًا بشوفهم من بعيد.

(يقوم بشرح اللعبة لحليم ونبيلة، ويشاركانه في اللعب وأثناء تلك اللعبة وعند لحظة ما ينظر حليم ونبيلة لبعضهما ويحدث بينهما تقارب.. يُظلم المكان ويضئ، ونرى المجموعة تعمل سويًا في إلقاء البذور).

المجموعة: ال هناك.. يا ملتقى حلو الرياح.

حليم: (يشجع حازم على العمل) شد يا حزيمة.

المجموعة: ال هناك.. يا منتقى طلع الصباح..

فؤاد: يالا بقى يا جميلة اشتغلي شوية.

جميلة: ممكن تخليك في زرعتك.

فؤاد: بهزر خلاص.

المجموعة: وينبت الكتف الجناح.. تشتد أيدينا معًا وينبت الكتف الجناح.

المفوض: (يظهر) هايل يا رفاق.. الشهر ده قدرنا نثبت إننا نقدر ننكر ذواتنا لصالح المجموع.. مبارك ليكم الانتهاء من المرحلة الأولى من حرث الأرض.

(تقتصر الإضاءة على حليم ونبيلة- شارع).

نبيلة: إيه اللي مصحيك تاني؟

حليم: بصراحة كنت قاصد المرة دي منمش.

نبيلة: ليه؟

حليم: أنا معرفتش أتكلم مع حد قبل كدة زي ما بتكلم معاكي.. يعني أقصد آخذ راحتي في الكلام، وأحس إني مفهوم.. أقصد..

نبيلة: فاهماك.

(فؤاد يظهر- بلاك).

نبيلة: يالا يا جماعة أنا جعت.

(يدخل حليم وحازم).

حليم: يا فؤااااااد.

فؤاد: (يدخل بالطعام، ويأكلون سوياً) دوقوا بقى الفطير ده.

نبيلة: ولو إني مبحبش أكلك.. (يظهر المفوض).

جميلة: ولا أنا.. بس هنعمل إيه؟ مضطرين!

المفوض: مبارك يا رفاق مبارك.. جدر زرعنا ثابت ومتبت في الأرض.. كل ده بفضل إخلاصكم وتفانيكم.

(يجلس المفوض ليأكل معهم وعند لحظة ما يحمل فؤاد الطعام ويدعوهم للعمل).

المجموعة: (في تكاسل) ال هناك دنيا التفاني والعمل.. ال هناك أرض الأمانى والأمل.

(تقتصر الإضاءة على حليم ونبيلة).

حليم: أنا أنجزت جزء مش بطل في الرواية.

نبيلة: حليم.. أنا متطمنالك.

حليم: إزاي؟

نبيلة: متطمنالك!

(تظهر جميلة فيغادران- بلاك).

حازم: خلصت الكتاب في يومين.

حليم: خد الكتاب ده ولو قدرت تخلصه في أسبوع.. ليك هدية.

حازم: هخلصه في أقل من يومين ومش عاوز الهدية.

جميلة: هتسهررو النهاردة يا نبيلة؟

نبيلة: (تخجل) اللي شفتيه ده كان صدفة.

جميلة: يا جمالك!

فؤاد: مش هنشتغل النهاردة بقى؟

جميلة: فؤااااااد!

فؤاد: بهزر.

المفوض: هايل هايل هايل.. قرب الحصاد.. زرعكم حي بيغني ويرقص وبينشد أغانينا.

المجموعة: (في حماس ورقص) ال هناك.. ليس لهنالك مثيل.. ال هناك كون النجاة والسبيل.. يا حالما بالورد دوما.. وردنا دوما جميل.

(تقتصر الإضاءة على حليم ونبيلة).

حليم ونبيلة: يا حالما بالورد دوما.. وردنا دوما جميل.

حليم: نبيلة..

نبيلة: نعم؟

حليم: إنتي جميلة.

حليم: أنا عاوزك معايا.. على طول.

نبيلة: (تبتسم).

(نسمع صوت زغرودة، ويتم وضع طرحة عروس على رأس نبيلة، ويرتدي حليم "ببيون"، ويظهر المفوض مرة أخرى).

المفوض: بكل سعادة نُعلن عن أول حالة زواج في ال هُناك.. زواج السيدة نبيلة من السيد حليم. (تصفيق).

المفوض: في واقع الأمر إحنا معندناش طقوس خاصة للمناسبات اللي زي دي، فمممكن.. (يُفكر) ممكن نسمع كلمة صغيرة من رفاق العروسين. (تصفيق).

جميلة: أنا هبدأ.. أتمنى حياة سعيدة وعمر مديد لحليم الحليم وجميلة الجميلة، وأتمنى الجواز مياخدهمش من الشغل لأكثر من يومين. المفوض: شكرًا يا جميلة الجميلة. (تصفيق).

فؤاد: في الحقيقة.. أنا مش من أنصار الجواز وما إلى ذلك من وسائل جلب العذاب للنفس.. لكن أنا سعيد جدا بالجواز ده لسبب واحد وهو إنهم هيحرقوا محصول الدرة في بيتهم مش أثناء الشغل ولا تحت بيتي في أنصاف الليالي. (تصفيق).

المفوض: حازم.

(يخجل حازم ولا يستجيب).

الجميع: حازم حازم حازم حازم.

حازم: بتمنى السعادة لحليم وطنط نبيلة.

نبيلة: طنط؟ طنط؟

(تركض خلفه ويركض هو مبتعدًا، ويقوم البقية بالفصل بينهم).

المفوض: نقطة نظام.. نظام.. الكلمة دلوقتي مع العروسة.

نبيلة: ممتنة لكل اللي حصل في حياتي الفترة الي فاتت.. فقدت كتير حاجات في ال هنا لكن لقيت حلیم.. كنت أتمنى ماما وبابا الله يرحمهم وصاحبتي يكونوا معايا (تبكي ولا تكمل).

المفوض: (يُقاطع) لا داعي للدراما.. تصفيق تصفيق.

(تصفيق).

حليم: أنا كنت...

المفوض: مين سمحك تتكلم؟

حليم: المفروض دوري.

المفوض: بعدي.. (يتقدم المفوض ليتكلم ولا يجد ما يقوله).

حليم: تصفييييق.

المفوض: اتفضل يا حليم.

حليم: كنت في يوم صحفي جواه وحش غاضب ساخط على كل شيء ولما شفت نبيلة من أول يوم الوحش هدي وهديت.. (لنبيلة) بحبك.

(زغاريد ورقص جماعي، يقتصر مجال الإضاءة على حليم ونبيلة مرة أخرى، ويتم خلع الطرحة وانتزاع الببيون).

حليم: بحبك.

نبيلة: بحبك.

(يُظلم المكان تدريجيًا).

(3)

(تقوم المجموعة بالعمل بكل همة واتحاد.. يجمعون أجولة عديدة بها المحصول ويقوم أكثر من عامل بحملها للخارج).

جميلة: (حلليم ونبيلة) حد ينزل يشتغل في شهر العسل؟
حازم: ملكيش دعوة.. مينفعش نتدخل في خصوصيات حد.
نبيلة: أيوة يا حازم قولها.. شاطر.
جميلة: بطل كآبة يا واد.. فك شوية.
حازم: تنمر؟
حلليم: (يضحك) أيوة متنمرة.
جميلة: والله أرجع ال "هنا" بتاعي.
فؤاد: ارجعي.
جميلة: لا هستحمل سخافتكم أرحم.
حازم: عيب.
جميلة: (في غيظ) هتفرسني!
(يظهر المفوض).
المفوض: (وهو يوزع عليهم نصيبهم من المال) مجهود عظيم يا رفاق.. أكثر مجموعة إنتاجًا في أول دورة زراعية.
جميلة: (في نبرة إعلانية) الفلاحون المثاليون!
حازم: (للمفوض) لو سمحت مشيها من ال "هناك".. لا تصلح!
نبيلة: أتفق.
جميلة: لم مراتك يا حلليم.
حلليم: (في سخرية) اتلمي.
حازم: أنا قاعد جنب المفوض.
المفوض: (يضحك) إنتو كمان أكثر مجموعة مشاغبة.. (يوزع عليهم نصيبهم من المال) المحصول فاق المتوقع.
حازم: (في فرحة) ال هناك.. دنيا التفاني والعمل.
المفوض: هدوء هدوء.. لحظة من فضلكم.. في قرار جديد.. بسبب زيادة المسؤوليات على المفوضين.. قررنا يكون في قائد لكل مجموعة لتسهيل عمليات التواصل.

حليم: أعتقد مفيش داعي.. الأمور ماشية كويس وقدرنا ننجز العمل وننجح في وقت قليل.

فؤاد: أنا بتفق مع السيد المفوض.

حليم: ليه؟

فؤاد: زيادة المسؤوليات هيزود الأعباء في الفترة الجاية، وده هيصعب مهمة الإدارة في التواصل مع كل فرد فينا.. الأفضل بالفعل يكون في ممثل عن كل مجموعة.. أنا اشتغلت في شركات كتير، وعارف خطورة عدم التنظيم.

المفوض: بالظبط.. وبناء عليه إحنا في حاجة ضرورية لانتخاب فرد ينوب عنكم.

حازم: حليم.

(يبدو على فؤاد علامات ضيق، ويحاول جاهداً أن يداريه، ويلفت ذلك نظر حليم).

المفوض: (يضحك) حازم اختارك يا حليم.. الولد الصغير قرر.. مفيش مفر.

جميلة: وإحنا ملناش صوت؟

المفوض: ليكم طبعاً يا جميلة.. عندك رأي تاني؟

جميلة: لا.. هو حليم.

المفوض: نفس الاختيار!

جميلة: أيوة بس عبرت عن نفسي.

نبيلة: أنا بتفق مع حليم إن مفيش داعي لتعيين ممثل عن المجموعة، وتفضل روح الجماعة هي القائد لكن لو ده الأصلح لإدارة المكان في المستقبل، فميش شك إن حليم هو أكثر شخص مناسب لقيادة المجموعة.. مش عشان جوزي.

فؤاد: (يبتسم) طبعاً حليم.

المفوض: إذن الاختيار وقع عليك يا سيد حليم.

حليم: الأفضل لقيادة المجموعة هو فؤاد.. اشتغل كتير في شركات وتمرس في العمل الإداري.. فؤاد هو الأنسب.

فؤاد: المجموعة عاوزاك.. إنت الأحق.

حليم: (للمجموعة) بتنازل عن حق التمثيل لفؤاد.. موافقين؟

حازم: لا.

نبيلة: مفيش فرق.. إحنا مصالحنا واحدة.

جميلة: مش معترضة.

المفوض: هنيئًا ليك يا فؤاد.

(يتجه حليم نحوه فؤاد ويمد يده نحوه ليُصافحه).

المفوض: هو ده ال "هناك".

(تتقدم بقية المجموعة وينتج عن ذلك تكوين يُشير إلى اصطفا فاهم خلف فؤاد، وينسحب المفوض).

(يتفكك التكوين وتُباشر المجموعة العمل بالأرض ويقودهم فؤاد، ويُمثل ذلك مرور عدة أشهر على العمل تحت قيادة فؤاد).

حازم: (ينتهي من عمله ويهم في المغادرة).

فؤاد: رايح فين يا حازم؟

حازم: ده وقت المدرسة.

فؤاد: طيب خلينا نأجل ده شوية.

حازم: لازم أمشي دلوقتي.

فؤاد: ممكن تاخذ أجازة من المدرسة النهاردة.

حازم: مش هينفع.. أنا خلصت شغلي.

فؤاد: للأسف إحنا متأخرين.. وانا شغل كثير.. محتاجينك معانا.

نبيلة: الولد لازم يدرس.. في إيه يا فؤاد؟

فؤاد: تمام.. كل اللي طلبته يساعدنا النهاردة بس.. مش هيحصل حاجة.

نبيلة: لا هيحصل.. من حقه يمشي.

جميلة: سيبه يمشي وأنا هشتغل مكانه.

حليم: (في استغراب) ليه تشتغلي مكانه؟!

فؤاد: إحنا محتاجين مجهود كل واحد.. أنا مقدر خوفكم على الولد.. بس أنا المسئول عن النتائج.. أنا اللي هتاسب.

حليم: ليه إنت المسئول؟ ومين إداك الحق في إنك تمنعه أو تتحكم فيه؟

فؤاد: أنا ممثلكم.

حليم: ممثلنا في التواصل مع الإدارة.. ده ميسمحللكش تتحكم فينا.

فؤاد: ده مش تحكم يا حلیم.

نبيلة: امشي يا حازم.. يالا.. امشي.

فؤاد: مش هيمشي.

نبيلة: اهدى يا فؤاد.

حازم: (يغادر مُسرّعاً).

فؤاد: (في انفعال) محدش يخالف كلمتي وأوامري.

حلیم: كلمتك وأوامرك؟ الاتجاه ده في التفكير خطير يا فؤاد.

فؤاد: بلاش كلام المثقفين بتاعك ده بقى.

حلیم: كلام مثقفين!

فؤاد: آه.. أنا بعرف أقول الكلمتين دول بردو، ويالا شوف شغلك.

حلیم: ده كلام ال "هناك" .. قوانين ال "هناك" .. نسيته ولا إيه؟

فؤاد: والي أنا بعمله ده عشانكو.. عشان ال "هناك" يستمر.

حلیم: فؤاد! إنت آخر مرة اشتغلت معانا بإيديك كان إمتى؟

جميلة: نهدي نهدي! مفيش داعي ...

فؤاد: أنا بشتغل أكثر منكم.. كلکم.

حلیم: مش حقيقي.

فؤاد: حقيقي، والمسئولية الي فوق كتافي محدش فيکم يقدر يشيلها.

جميلة: فؤاد.. حلیم لو سمحتم خلاص.

فؤاد: قوليله.. الي مش عاوز يلتزم بالقوانين.

نبيلة: قوانين إيه يا فؤاد؟ إنت نسيته إحنا كلنا واحد.. مجموعة واحدة.. حقوقنا وواجباتنا واحدة.

(يُغادر فؤاد كأنه ينوي شيئاً ما).

(صمت).

حلیم: (يتنفس) شامين؟

نبيلة: شامين إيه؟

حليم: الهوا فيه حاجة.

جميلة: ماله الهوا؟

(يقتصر مجال الإضاءة على حليم).

حليم: كأنه مبقاش زي الأول.

(يتسع مجال الإضاءة وتقوم المجموعة باستئناف العمل، ويظهر فؤاد وهو يرتدي ملابس مميزة عن المجموعة).

المجموعة: (في تعب) ال هناك.. يا ملتقى حلو الرياح.. ال هناك..

جميلة: أنا تعبت.. الشغل كتر ومبقاش في فرصة للاستمتاع بتواجدنا هنا زي الأول.

المفوض: بالفعل نفس الشكوى اكررت في مجموعات مختلفة.

نبيلة: الحل إن ظروف العمل ترجع زي الأول.. إحنا مش في حاجة للمنافسة، ومش محتاجين نضيع كل الوقت ده من حياتنا في الشغل.

فؤاد: لو تراجعنا عن العمل بكل جدية مش هنعرف نعيش.. أرقامنا في تصدير المحصول هتراجع ومش هنقدر نصرف على احتياجاتنا.

نبيلة: أرقام وجدية ومنافسة وضياح!! إيه كل المصطلحات الجديدة على ال "هناك" دي.

فؤاد: المصطلحات دي ظهرت عشان إحنا بنتطور.

حليم: إزاي عرفنا نعيش سنة كاملة من غير ما نضطر نعمل ده؟ (للمفوض) المكان بيتغير.. الهوا بيتغير.

المفوض: مفيش داعي للروح السلبية.. الأمور بخير.

حازم: أنا بغيب كتير عن دروسي.

المفوض: مش هقدر أنكر إن ظروف العمل ساءت شوية في الفترة الأخيرة.

فؤاد: لكن صدقوني إحنا شغالين على تحسين الأوضاع.

حليم: مين إنتو؟

جميلة: (في تأنيب لحليم) حليم! إحنا بنثق في إدارتكم وحرصكم على مصالحنا.

نبيلة: إزاي ظروف العمل دي تتحسن؟ هل عندك خطة؟

فؤاد: في الحقيقة في حل اقترحناه على المفوضين..

حليم: مين اقترح الحل؟

المفوض: ممثلين المجموعات. (يبتسم حلیم في مرارة ويختار ركنًا بعيدًا ليجلس به).

نبيلة: إيه الحل؟

(صمت).

فؤاد: الآلة.

(صمت).

حلیم: (يضحك).

حازم: ال "هناك" مبيسمحش باستخدام الآلة.

المفوض: ده الحل المناسب في الوقت الحالي.

نبيلة: (تضحك وفي تعجب) الآلة! الآلة! لا برافو.. عشرات الآلات طبعا في البداية وبعدين مئات وآلاف المعدات.. إنتو درستو الأثر البيئي اللي هينتج عن الاستخدام ده؟ مين استشارنا؟ مين إداكو الحق في التعدي على البيئة؟ مين إداكو الحق في تغيير نمط حياتنا؟

فؤاد: ده المتاح يا نبيلة.. عشان تبطلوا شكوى عشان حازم يلاقي وقت يدرس فيه.

المفوض: وحليم يكتب روايته.. عشان الوقت يتسع ليكي ولجميلة لعمل أشياء ثانية غير العمل المستمر.

فؤاد: أوعدكم.

المفوض: بنوعدكم.

فؤاد: بنوعدكم هيتم استخدام الآلة في أضيق الحدود.

نبيلة: أنا مش موافقة.

فؤاد: إحنا بنفكر في الأصح للمكان، لو في فرد أو اتنين مش موافقين مفيش مشكلة.. أفكر إحنا دلوقتي ناضجين كفاية عشان كل واحد يقرر مصيره..

حلیم: (كأنه يفهم ما يحدث ولا يسأل بقدر ما يجيب) كل واحد يقرر مصيره إزاي؟

المفوض: إحنا فكرنا_طبعا بعد التشاور_فكرنا في إلغاء مبدأ الملكية العامة، و...

فؤاد: إتاحة الأراضي والمساحات السكنية للتملك الخاص.. كل فرد مسئول عن بيته عن أرضه وعن المحصول.

المفوض: ببساطة يا رفاق كل فرد حر في استخدام الآلة أو في عدم استخدامها.

حلیم: آه آه.. أيوة!

جميلة: خلونا نجرب.

حازم: غلط.. غلط!

حليم: (للمفوض) سيادة المفوض.. فاكركلامكم في البداية!! فاكركلامكم؟

فؤاد: الأمور محتاجة بعض المرونة.. مفيش أشياء كتيرة هتتغير.

المفوض: مفيش شيء من مبادئ ال هُناك الأساسية الراسخة هتتنحرف عن مسارها.

جميلة: حليم نبيلة أرجوكم كفاية استباق للأحداث.

حازم: الآلة لا.. الآلة لا.

حليم: سيادة المفوض!! فاكركلامك عن العدل؟ عن حق الجميع في كل الأرض.. عن العمل المشترك وروح الجماعة؟

المفوض: الأمور بتتغير والمنافسة بتزيد.. الناس بتزيد، وال "هُناك" بيتعرض لنقص في الموارد.

فؤاد: ال "هُناك" لازم يستمر.. لازم يستمر سكنا الآمن.

نبيلة: سيادة المفوض! فؤاد! ال هُناك بيتجه لتعظم النزعات الفردية والانتهازية وبيعزز المنافسة والعداوة.

حازم: (يجلس بعيدا ويكتم أذنه ويبدو عليه القلق والتوتر ويظهر ذلك من خلال هذه لقدميه).

جميلة: إنتو عاوزين إيه؟ سيبوهم يحاولوا يحسنوا حياتنا.. هم من إمتى خدعونا؟ كل الجنة والخير اللي عايشين فيه ده بسببهم.. إحنا كنا نحلم أصلا نعيش في الجنة دي.. أنا مش مستعدة أرجع أعيش في ال هُنا بتاعي تاني.

فؤاد: أنا مقدر القلق والخوف اللي بتمروا بيه.. صدقوني! الجنة هتفضل جنة.

المفوض: الجنة هتفضل جنة.

حليم: (بيتعد وفي لا مبالاة) الجنة هتفضل جنة.. مش كدة ولا إيه يا سيادة المفوض؟ فؤاد! مبروك اللبس الجديد.

(يعلو صوت الآلة تدريجيًا دلالة مرور عدة شهور، ويُصاحب ذلك ظهور للدخان وتزداد كثافته، ونسمع صوت سعال نبيلة يزداد حدة، وتبدأ مفردات الصورة في التحول بشكل **جزئي** لتشبه مفردات الصورة في ال هُنا).

(4)

- نبيلة تسعل أثناء سقي الزرع.

- يتحول المنظر في جزء من المسرح إلى تكوين أقرب ما يكون إلى شركة، وفؤاد يشرح لحليم وجميلة وحازم قواعد العمل ثم يصعد إلى مستوى عال يبدو أنه مكتب المدير.

- فؤاد يعطي ملفات عديدة لحليم وحازم ويطلب منهما إنجاز العمل، ويبدو أنه يقوم بترقية جميلة ويقوم بإبلاغ حازم وحليم، ويطلب من جميلة أن تتبعه إلى المكتب.

جميلة: شكرًا على الترقية يا مستر فؤاد.

فؤاد: (لجميلة التي تقدم له أوراق في مكتبه) ده من حقك.

جميلة: كله بفضل تعبك معايا وتوجيهك.

فؤاد: بلاش مستر.. إنتي بالذات بلاش.

جميلة: شكرا يا فؤش.

فؤاد: لا مش للدرجة.

جميلة: الله! مش إنت اللي عاوز كدة!

فؤاد: (بعد صمت وتأمل لها) جميلة إنتي جميلة.

(حليم يجلس تائهاً في مكتبه في جزء أقل من مستوى فؤاد ويبدو أنه يراجع أرقام تخص العمل).

حازم: حليم تعالى نمشي من هنا..

حليم: هنروح فين؟

حازم: ده مش مكاننا.

حليم: وطى صوتك.. ممكن يسمعك.

حازم: مش مهم.

فؤاد: إزاي مكنتش شايفك الفترة اللي فاتت دي كلها؟ إنتي حلوة يا جميلة.. حلوة فعلا.

جميلة: شكرا يا مستر فؤاد.. تحب تشوف تقرير صيانة المكن؟

فؤاد: مش دلوقتي.

جميلة: (تهم بالمغادرة) بعد إذنك.

فؤاد: استني شوية.

حازم: إنت إزاي بقيت سلمي كدة؟ فاكركلامك القديم؟

حليم: اهدى يا حازم.

حازم: فؤاد غلط.. غلط.

حليم: مفيش حاجة بإيدينا.. مش هنقدر نوقفه عند حده.

حازم: مش هسكت زيك.

فؤاد: (يقترب منها كأنه يتحرش بها) عاوز أخذ رأيك في حاجة؟

جميلة: مستر فؤاد لو سمحت..

فؤاد: (يقوم بالاقتراب منها أكثر).

جميلة: مستر فؤاد أنا محتاجة أخرج.. لو سمحت.

فؤاد: لو سمحتي إنتي.

جميلة: هصرخ.

فؤاد: ليه بس؟ "صمت" طيب اصرخي!

(لا تستطيع جميلة أن تصرخ وتصمت وتستسلم.. يقترب منها فؤاد شيئاً فشيئاً).

حليم: مقدرش أعمل حاجة دلوقتي.

حازم: تقدر تعمل كتير.

حليم: مهما عملت مش هقدر أغير حاجة.

حازم: على الأقل نكون حاولنا.. إنت أملنا.

حليم: بلاش الكلام ده يا حازم.. خرينا واقعيين.

حازم: إيه رأيك نشكيه للمفوض؟

حليم: (ينظر لحازم ويضحك في سخرية).

(يقوم فؤاد بالانتهاء من ارتداء ملابسه).

فؤاد: هستنى تقرير صيانة المكن.

جميلة: (في خوف) حاضر.

(يظهر المفوض وينظر لجميلة التي تغادر في اندهاش).

المفوض: هي مالها؟

فؤاد: أبداً.. إرهاق العمل.

المفوض: إرهاق العمل!

حليم: إنت لسة صغير يا حازم.. كنت في يوم زيك برئ وجميل.

حازم: أنا مش هبقى زيك.

حليم: أتمنى.

(صوت الآلة يعلو في الخلفية).

المفوض: سامع صوت الآلة؟

فؤاد: أبشرك يا سيادة المفوض.. إيراد اول دورة إنتاج هایل.

المفوض: بص على التقارير.. الهوا بدأ يتلوث.. إزاي هنسيطر على ده؟

فؤاد: دي ضريبة النجاح.. ضريبة إن الهناك يكبر.

المفوض: مش ده ال "هناك" اللي حلمنا بيه.. اللي وعدنا بيه الناس.

(نبيلة ترتدي كمامة وتعاني من سعال خفيف، وتقوم بسقي الزرع حول بيتها وتظهر جميلة ويبدو

عليها آثار بكاء.. تقوم نبيلة بمساعدتها على الجلوس وتنفجر جميلة في البكاء).

نبيلة: بس بس.. إيه حصل؟

جميلة: فؤاد.. (تبكي ولا تستطيع تكمل).

المفوض: معجبنيش آخر اجتماع لممثلين المجموعات.. الاتفاق كان استخدام الآلة في أضيق الحدود.. التوسع في استخدامها مؤشر شديد الخطورة.. الإدارة قلقانة.
فؤاد: أحلام قديمة سيادة المفوض.. أحلامنا الجديدة محتاجة توضحيات.
المفوض: التنازل قدام رغباتكم من الأول كان غلط.
فؤاد: الناس تعبت، والهدف إننا نريحهم.
المفوض: كان الهدف من البداية.. هناك أرحم وأجمل.
فؤاد: ليه الانهزامية دي يا سيادة المفوض؟
المفوض: انهزامية!

نبيلة: الحيوان!
جميلة: معرفتش أصرخ.
نبيلة: تعالي.
جميلة: هنروح فين؟
نبيلة: ناخد حقنا منه.
جميلة: لا بلاش.. بلاش إحنا مش قده.

المفوض: (في عصبية) الآلة لازم تقف.
فؤاد: ده مش قراري ولا قرارك.. قرار الأغلبية.
المفوض: (ينظر له في غيظ و يغادر).
فؤاد: سيادة المفوض! نسيت الإيراد! (يعود المفوض ليأخذه ويغادر مندفعًا).

نبيلة: (لجميلة) حلیم شم فساد هوا من زمان.. من زمان.

حلیم: (لحازم) كل الي نقدر نعمله إننا نحافظ على نفسنا من الجنون.

(نسمع أصوات الآلة تزداد تدريجيًا دلالة انتشارها ومرور عدة أشهر أخرى، وتتغير مفردات الصورة بشكل أكبر نحو القبح، ونسمع صوت سعال نبيلة يزداد).

(5)

(على وقع صوت الآلة.. يجلس حلیم ونبيلة معًا).

نبيلة: (تسعل) مش هتبطل سرحان بقي يا أستاذ حلیم؟

حلیم: (ينظر لها في تأمل) إنتي جميلة أوي.. أنا بحبك.

نبيلة: إنت حبيبي ورفيق رحلتي.

حلیم: شكرا إنك موجودة.

نبيلة: حلیم.. عاوزه أقولك حاجة؟

حلیم: قولي.

نبيلة: إنت شايفني يعني رجعت أتعب تاني..

حلیم: ادخلي في الموضوع يا نبيلة.

نبيلة: عاوزه روح مننا.

حلیم: مش مستعد.

نبيلة: وهتستعد امتي؟ أنا بكبر يا حلیم، والتعب ييزيد.

حلیم: لما ال "هناك" يرجع هناك.

نبيلة: الزمن مش هيرجع لورا.. عاوزه روح مننا يا حبيبي.. يكمل مشوارنا.

حلیم: مشوار إيه؟ مشوار الخيبة!

نبيلة: مش مشوار خايب يا حلیم.. مشوار كله محاولات.. كله سعي وأمل.

حلیم: مش هجيب عيل يورث الشيلة الثقيلة دي..

نبيلة: ال هناك جايز يرجع هناك من تاني على إيده، أو على إيد ولاده.. إحنا هنعلمهم كل يوم إيه شكل ال "هناك" حقيقي.

حلیم: كفاية شاعرية يا نبيلة.. كفاية أحلام.. هيرحموه؟ فؤاد وأمثاله وأحفاده هيسمحوله ينجو بنفسه أو بغيره؟

نبیلة: مش ہیرحموہ.. بس اِحا ہنکون فی ضہرہ.. بنعلمہ وبنوجہہ، وبنشاورلہ علی الطریق.. عشان
یکون عضمة فی زورہم.

حليم: أنا مش هقدم ابني قربان في المعركة دي.

نبيلة: هو إنت بتعمل إيه عشان ال "هناك" يرجع هناك؟ قاعد مستسلم ويأس وفتح على روحك أوضة ضلمة غرقان جواها.

حليم: مش يائس ولا مستسلم.. أنا هكتب روايتي.

نبيلة: فوق إنت يا حليم.. سنين وإنت بتحلم بكتابة رواية ملهاش وجود.. أرجوك سيبك من وهم الرواية، ومن وهم المثالية.. مضطربن نعيش ونواجه.. كفاية هروب.

حليم: الحقيقة أصعب من إنها تتعاش يا حبيتي.. "إنت أقوى وقادر تواجه" .. أنا مقدرش.. مقدرش أستحمل هزائم جديدة.. أنا هفضل كدة.. راضى أوى.. سييبي هكتب الرواية.

نبيلة: روايتك روايتك! أنا روايتك يا حليم.. خلينا نكتبها سوا يا حبيبي.

حلیم: ھنکتب ایہ؟

نبیلة: نكتب لولادنا عن هُناك كله أمل ورحمة.. عن هُناك يعيشوا يحاولوا يبنوه بأيديهم.

حليم: مفيش هُناك.. ال هُناك بااااح!

نبيلة: طيب ما تيجي نفكر نأسس جورنال صغير وتمارس مهنتك الحقيقية.. سيب الشغل عند فؤاد.

حليم: هيکسروا قلمی من تانی.

نبيلة: تعالی ساعدنی نكمل زراعة الشجر حوالين بيتنا وبيوت التانيين.

حليم: (صمت).

نبيلة: أنت عاوز إيه يا حلیم؟

حليم: عاوز صوت الآلة ده يقف.

نبيلة: مش هيقف.

حليم: إحنا السبب.

نبيلة: إحنا حاولنا.

حليم: مكنش كفاية.

نبيلة: أنا تعبت.. إنت فاكرني إيه يا حلیم؟ فاكرني إيه.. أنا برودو محبطة ومحطمة وحاسة بخيبة أمل.. بس بعمل إيه؟ ها بعمل إيه؟ انطق! بقوم كل يوم.. أشتغل.. أحاول.. أعمل واجبات البيت المملة..

أسقي الزرع حوالين البيت.. أخرج وأتواصل مع الناس غصبن عني.. بجبر نفسي على الالتزام نحيثهم ونحيثك.. أعلم أطفال ال "هناك" .. أكلهم عن الشجر وعن الخضار وعن ال "هناك" زمان، وأرجع أخفف عنك تعب اليوم وأرمم الي كسره الزمن في روحك.. بعود نفسي على ده كل يوم وأقاوم عشان منهارش وأستسلم.. إنت بتقدملي إيه؟

حليم: (ينظر لها صامتًا).

نبيلة: أنا بكرهك..

حليم: (تدمع عيناه).

نبيلة: أنا آسفة.. آسفة والله أنا بحبك.. عشان خاطري خلينا نحاول لحد ما يتقطع نفسنا، وآخر شعرة في راسنا تبيض، وما نبقاش قادرين نمشي ولا نتكلم.

(يُغادر حليم).

نبيلة: (تنادي عليه) حليم ...

يزداد صوت الآلة تدريجيًا مع كل لقطة تالية:

- المفوض يقوم بالتحقيق مع فؤاد لشكه بتحرشه بجميلة وجميلة تنفي.

- ينزوي حليم ويتحلى بالصمت، ويجلس بجانبه حازم.

- يظهر على فؤاد علامات الثراء أكثر، ويظهر المفوض قليل الحيلة أما فؤاد.

- نبيلة تسعل بشدة.. يزداد سُعال نبيلة إلى أقصى حد.

(تحتضر نبيلة ويجلس بجانبها حليم).

نبيلة: (تسعل بشدة).

حليم: (يحاول التخفيف من ألمها) هتبقي كويسة يا حبيبتى.. حاسه بإيه؟ عاوزة إيه؟

نبيلة: خلاص يا حليم.. تعالى اقعد جنبى.. (تُمسك بيد حليم) معلش يا حليم.

حليم: عشان خاطري يا حبيبتى.. خليكي هنا.. خليكي معايا.

نبيلة: أنا شايفة زرع وخضار وجمال.. شايفاك جميل يا حليم.

حليم: إنتي أجمل إنسانة.. إنتي ال "هناك" يا نبيلة.

نبيلة: (تخرج من حائط البيت) شايفاك شاب وسيم، وجميل، وكلك حياة وتمرد.

حليم: هنرجع شباب وهنعيش سوا ألف سنة.. أنا آسف يا نبيلة.. آسف.

(تدخل نبيلة إلى خيط إضاءة أبيض ممتد من عمق المسرح إلى المقدمة، ثم تخلع ملابسها فنراها ترتدي فستاناً ناصع البياض، ويحاول حلیم اختراق خيط الإضاءة لكنه لا يستطيع).

حلیم: خليكي هنا.. أرجوكي.

نبيلة: مفيش ربو ولا هوا ملوث، ومش إنت بس اللي جميل.. كل الناس طيبين وجُمال.. عيش كثير يا حلیم.. اتجوز وخلف أطفال.. معلش يا حبيبي.. معلش.

حلیم: هخلف منك.. هنجيب عيال كثير ونعلمهم ونعيش عشانهم.

نبيلة: علمهم الحب والخير، والصدق.. بحبك.. (تنزل إلى الصالة).

حلیم: هنعلمهم سوا.. استني.. نبيلة!

نبيلة: (وهي تقطع الصالة إلى الباب الخلفي من المسرح) خليهم يزرعوا شجر كثير.

حلیم: يا نبيلة.. أرجوكي خليكي.. آسف آسف..

نبيلة: وميفقدوش الإيمان طول ما هم عايشين ب هُناك حقيقي.

حلیم: هعملك كل اللي عاوزاه وهعوذك عن كل لحظات يأسى وكمان هعيش في حضنك وتحت رجلكي.. هنجيب عيال يا نبيلة.

نبيلة: لسة معداش الوقت يا حلیم.. معلش يا حلیم.. معلش.

نبيلة: (تبتسم وتنظر إلى الأعلى وترتقي عبر آلية ما).

حلیم: (يبكي) نبيلة.. نبيلة أرجوكي يا حبيبي.

نبيلة: متأسفش.. الأحسن تزرع شجر.

حلیم: أنا بحبك أوي.. إنتي ال "هُناك" الحقيقي يا نبيلة.

(يقوم حلیم ببذر بذور شجرة وهو يلهث، وبينما يقوم بدراما حركية تعبر عن فعل "الزراع" تنمو شجرة بينما على المستوى الأعلى يقوم فؤاد بتعبير حركي يُعبر عن عمل الآلة.. وينتج عن ذلك دخان كثيف.. حلیم يسير بالطرقات بينما فؤاد يراقبه من أعلى، ويظهر المفوض أيضًا ويبدو عليه أنه لا يرضى عن الحال التي وصل إليها ال "هُناك").

حلیم: (لفؤاد) تزرع شجرة؟.. (لمارة آخرين) ازرع شجرة.. ازرع شجرة..

يُغلق الستار